



08 FEB, 2025

Matador sedia halang THT raih kemenangan

Utusan Malaysia, Malaysia



Matador
sedia halang
THT raih
kemenangan

PETALING JAYA: Ketua jurulatih Matador, K Yogeswaran mengakui pasukannya perlu mendapatkan sekurang-kurangnya satu mata apabila dijadual menentang Pasukan Hoki Terengganu (THT) dalam saingan Liga Hoki Malaysia (LHM) di Stadium Hoki Nasional Bukit Jalil, hari ini.

Yogeswaran mengakui tugas tersebut bukannya mudah memandangkan THT merupakan pendahulu LHM, namun misi mencari mata tetap diteruskan dan tidak akan memberi laluan mudah kepada lawan.

“Saya tidak nafikan perlawanan esok (hari ini) sudah tentu sukar buat kami memandangkan THT adalah pendahulu liga tetapi kami cuba bagi tentangan.

“Untuk aksi tersebut, saya ada membuat rombakan serta perancangan bagaimana untuk melakukan serangan balas pantas terhadap THT dan kita tahu Faizal Saari serta Lee Nam Yong tonggak serangan mereka.

“Memang sukar untuk kami kalahkan THT tetapi akan berusaha untuk melakukannya,” katanya kepada *Utusan Malaysia* di sini semalam.

Dalam pada itu, Yogeswaran berkata dia tidak meminta anak-anak buahnya mengawal ketat mana-mana pemain THT sebaliknya menggesa mereka mengikut segala perancangan dan taktikal pasukan.

“Pemain kami tidak akan menjaga mana-mana pemain THT tetapi mereka perlu mengikut segala perancangan pasukan dan sentiasa bekerjasama,” katanya.